

文山先生全集

四

新子船

PDC

文山先生全集卷之六

書

回寧國陳節推容

去年闕下拜書稍得數數未幾聞捧檄校文不知陶鑄何
處人物某自是即汰斥去閉門深山遂無復鱗鴻一日之
便忽使者來山中欣得妙帖見示小錄方知昨者衡鑑所
嚮近思想歸舟蕩漾彭蠡吾知心正在香爐峯白雲下耳
宣之弛征執事首從吏之幸而集事僅足了吾輩之責非
相與爲賜也書來乃知宣人以此爲多祠之以識其不忘
之意休惕於孺子之入井豈爲內交要譽設抑桐鄉父老

此意亦能使人感激耳宜爲郡凋劇極力扶持幕畫間想見勞苦盤錯糾結以試利器天下事正有賴於方來耳某前冬一出去秋一歸進退行藏惟其所遇而無心焉則今奉親課子彈琴讀書流水青山悠然獨徃不煩故人江雲渭樹之思也史記見貺家藏本皆不及尚當朝夕以稱所蒙明善錄一部謾侑歸牋臨墨馳泝之至

與吳提刑觀

某頃待罪闕下薄奉函書僕被來歸嗣音杳邈上下人物感念世道未嘗不與門墻拳拳也某比者伏讀邸報欣審玉陛出綸繡衣移節夜醉長沙曉行湘水已著平反風酣

童貢日麗崆峒更煩輕熟江湖相望原隰增輝某官宣慈
而惠和高明而正直義豐授受孔孟氏之淵源江左聲名
王謝家之門第蚤立登於閭闔端坐厭於蓬萊竹馬相呼
春生襦袴星輅所至雨旸旡楊茲游捧於英函乃肯臨於
梓部刺史故人按事飲酒情法相當忠臣孝子畏道驅車
君親交盡靡需席暖已趣詔溫某杜門深山去城郭甚遠
而於太和差近初謂旦夕使輶泝顛石而前可於快閣上
下迎候一拜忽傳英蕩小駐青原某揆之始望則蹉跌矣
瞻睇行臺輒易奉狀代叙燕雀之萬一若夫揚清激濁洗
寃澤物間閭欣欣無所患苦使屏退之蹤亦得從畎畝以

自放適是則某之所自賀者也臨楮切切

與湖南陳提舉合

號中山

某猶記乙丑之夏從江西提幹得往來行書江闊雲空斗
光如水每懷世道上下人物未嘗不中夜耿耿某茲者恭
審奉少府節駕常平車衡徽連雲遠挹海山之秀天因麗
漢近垂楚分之光原隰春深旌旗風動伏惟歡慶某前年
與公同除郎去年與公同除節不才安得追附名勝自分
却立下風猶幸時論不磨得公輩落落叅錯使民物吐氣
國庶幾耳相望千里北斗在天何時執鞭寫此冲懷

回林學士希逸

號竹溪

某夙有幸獲與介弟爲賓恭因之有以詢居處著作之萬
一不戚戚得喪而言語文章足以詔今傳後竹溪先生何
憾哉一日之赫赫者多矣千載而赫赫者幾人爲一日計
者無千載也央矣

回贛守李宗丞雷應

號樓峯

某偃薄林阿不虞使者之涉吾境也廼自空同來顧我猿
鶴米家書盡光怪湍山此豈四海九州同年無情者邪僕
家青原深處實與君侯黃童白叟接畛而處自下車以來
但見年穀獨登鼙鼉屏息不需數月報政赫然茲豈千里
能事環君侯四境鷄鳴犬吠晝夜相聞實共受賜僕也彈

琴讀書於其間其賜多矣敢圖高誼厚鎮撫之委貺盈箱
非所當得睇瞻霄立頓首知歸吾鄉宰邑於使天之下者
三人焉其一爲陳行夫若羅子遠蔡濟甫皆曲江齊盟者
奉令承教必有可觀廬陵一歎異於常年田里憔悴不堪
舉目惟章貢素無糴事而得歲又偏鄉人顛頃者徃徃相
率而趨治國民食關繫苟可通融無愛秦晉公之惠也謹
復書空山白雲無足持報薄言采藻臨風如馳

回交代湖南憲新除湖北漕李宗丞

某既專鱗幅奉起居猶有腹心不嫌齎擘某屏時寬閑無
復山外想公朝念其流落昇節起家使之繼明公印綬之

後聞命憮然不知所爲堂有重譖蓋年耄矣湘行且千里
舟車迎待不堪顛頓是以懇悃丐祠冀便私養天高聽邈
促旨且頒叱馭回車進退維谷將從鶴髮而來耶則非養
志將又以香火請耶是何爲者而爲是瀆也謀之乃心稟
之親老旦夕姑以旨甘屬弟輩單車將指以明不敢自棄
於明時而復以不得將毋重告之造命俟驅馳數旬即乞
身以歸爲臣子稍盡幾分耳某於門牆知己論交非一日
天又開之以奉令承教之機是其與四海九州之同年其
有情益倍倫等誠不圖解后及此古之君子其爲人也謀
之必忠愛其人也惟恐其不入於德故敢疊疊陳出處之

槩惟執事啓誨而圖利之言不盡意臨風如馳

與江西黃提刑震

某幸托年盟夙依廛部竊跡萬山底衣被末光飲墜露食
落英粗安半菽公之餘也久踈晤寫湍目春雲一水盈盈
遡唐河漢某茲者共審出綸鳳闕移節虎城春信初傳立
變旂楊之舊天光下照重瞻禮樂之新依然故部之江山
籍甚先庚之號令伏惟驩慶某官剛不吐而柔不茹寬有
斷而愛有威發爲文章正諧韶濩勁沮金石凜然節槩光
垂虹霓聲揚紫微早分潁川二千石之符就秉天國十三
星之節據案叱吏笑比黃河清開門賑飢功過中書考上

久簡孟博登車之志公遂爲勝之持斧之行春風遍地而
徃行虛夜月當天而鼙鼙伏載馳驅維驥維駱靡憚周
咨來游來歌如圭如璋言觀肆覲某避影杜門久矣不作
山外想不圖元會之日上恩覃及流落畀相讞於珠玉之
側虎鼠同噐猿鶴笑人 云云

回林司業應炎

某夢想巍巍堂堂於朝花院柳間追隨猶昨日事也玉烟
劍氣轆轤崢嶸杳然在碧雲崔嵬之外江月流水實照云
云某官以水輪金井之心胸發黼黻火龍之光燄而又慥
慥乎言行皦皦乎進退若汲長孺若陸敬輿若慶曆元祐

諸賢克公之爲表裏庶幾其無愧領袖斯文旗翼元命天下以此望公者殆人人同願玉立以需之某自歸來乎山中俯仰半菽不復得與四方書牘從事比從戶曹黃文得誨函草木同味玉雪照心欣懌之餘感慨係之某蹉跎之蹤何可爲者大化驅之一節誤落湘雲避走陳情俞音竟閱單車徊徨且此首涂行復求返吾屠羊而已渺渺天一方重此懸沂專容陸續貢敬

回信豐羅宰子遠

名椅號澗谷

某去年聞雙鳬南上落落空山不如燕雀之爲有情也大化驅人作江東客數月爬梳枵輒未見端倪會誤恩召環

灣班過當亡何狼狽而去蓋踈闊以來居多道路之日出
處華方滋可爲笑杜門息影中高情厚鎮撫之專介持書
勞苦臨風馳感可人天一方信豐山水色見謂讀書松竹
晝影消簾著吟人其中所謂予方有公事此豈錢穀吏比
耶勿需終更西清有詔壁弟何爲者赴新昌且百日商鉅
馳河未知攸濟惠徼如天之福寡過多取數矣賴瑞皆佳
邑藹藹吉人鼎立空同真一時之盛當路或令舉所知某
幸甚有以藉手薄言修布小附芹心非敢謂報倚筆磨泝

與前人

某臘前函書往來庶幾契闊之意年光冉冉驚見雙壁蓋

曾兄季困專紀綱寔來仰惟同年長者所以惠綏荒寒皆可感也某雲卧深山世意落落一起一仆非人爲之上天蓋高匪怒伊教敬威念咎安得不力執事昔爲之助喜今亦有以救其不逮乎敢請季困值儒者之窮執事以氣類遇合所以位置之者寵甚萬間寒士公將溥其施於一時所謂兆足以行矣某爲之歛衽新年喜雨燈前報命馳想一方臨紙悁悁

回羅子遠就賀除京權

某俯仰歲年甚知聞問頃知捲旆來歸衣錦有爛且趣舍人裝于于然東矣函欲擘牋所思雲鵬鶴倦不可拈拾竟

墮夢寐外時一動寥廓想江邊鷗鷺爲之悵然忽得手書
責我空谷華袞流離辟易久之共審帝闕出綸天京司轄
姑養遙駕之望佇傳莪豸之音伏惟驩慶明公契古胸襟
吞雲夢者八九外物瑣瑣遲速何心積之厚發之弘宇宙
間華軌清貫將次第而取之以其時考之則過矣某風雨
深山避影却走乃元會之日公朝以一節起其流落回首
三湘驚心蕉夢請隸香火肯更趣行慈親以遠役爲憚進
退維谷莫甚此時旦夕黽勉拜命姑單騎之戍驅馳數旬
乞身歸卧綿上同年有情不隔四海九州之遠毋金玉尔
音異一語以自壯拂拭過情非所敢當也占對梗槩尚猷

嗣牋

其一之日既端拜敬謝芳題并報信豐薄楫雪之槩二之日謹遣介馳諸席間寅奉起居不敢繁叙首祈委鑒某臨歲入湘後墮身微纏中磨沂宇下闊焉嗣音繼聞趣戒朝裝榮司京權某念欲牋忱賀慶以申風雲發軔之慶一春屑屑行路浸墮因循既抵空同後潼川趙同年來爲縣實在河陽舊桃李慶鴻沙指爪猶記東西所以告新者甚厚因得切諗修門近况大帶深衣長身玉立道德福澤方來而未艾也吾鄉諸老行輩落落歸然靈光惟今澗谷先生依星辰傍日月一日騎麟翳鳳朝閱風夕玄圃勢正順耳

某粉陰杏集素辱心期慕王陽之回車學毛義之捧檄得
郡山深俯仰半菽君師天地之造知己錫類之餘也惟是
求牧力綿未知攸淑回首蔽芾我愛桐鄉豈無一言益其
故人并寄父老因風東向頻首以請

與汪安撫立信

號紫源

某仰惟曠度絕人不作邊幅僕安得以書生刀尺從事高
明幸察之某昨者爲高安受容受察於玉斧之下公不以
衆人畜我我實德公未幾公去之而僕亦以憂患連年卧
山中蹤跡跋蹇不足爲知心道也撫念江流人物如此未
嘗不中夜耿耿某茲者伏審揚綸九陛建纛三湘人無異

辭國有生氣共惟慶愜欽以某官名高九牧氣蓋群公江
左管夷吾足係英雄之望軍中范老子能寒寇賊之心往
者金湯中流忠績簡在上方以南事爲慮詔公方面隱然
長城一代數人百年幾見公不得不力紀勲旂常歸衮廊
廟自此等而上之某退在漁樵未忘嫠緯聞公此來爲世
道擊節偶逢黃君強立長沙便介率然上狀仰闕賀床強
立名至道某昨嘗薦至館下強立每謂公以意氣動人能
使人不愛其軀其感激知己可見今茲適在臬府從諸公
遊公不以生客視強立強立奉筆墨以佐大闡豈直一日
之長而已憑筆僭越向風如馳